

- he berde, wo he my wolde toryten.  
 it is wâr, wôr sik twe hunde byten  
 umme enen knoken, ên mot vorlesen.  
 5750 daromme dochte my dat beste wesen,  
 dat ik wolde wyken syneme törn,  
 wente syn gemode was vorwôrn;  
 he was sêr gram, so is he noch;  
 secht he anders, he lucht alse ên droch.  
 5755 vraget des sulven syn wyf,  
 wat hebbe ik to dônde mit deme ketyf?  
 sêt, here, alse he do des wart wys,  
 dat se bevroren stunt in deme ys,  
 he schalt, he vloked overlût,  
 5760 unde gink do tô unde halp êr út.  
 dat sulve, dat he ôk hier klaget,  
 dat ên de bure hebben gejaget,  
 ja, dat dede ên beden sêr gât,  
 unde makede ên beden warm dat blôt,  
 5765 wente se weren in deme yse vorvroren.  
 wat schal men hier lenger na horen?  
 it is tomalen ene grove untucht,  
 de alsus syn egen wyf belucht,  
 se is jo hier, men mach se vragen:  
 5770 were it so, ja, se wolde wol klagen:  
 ik bidde umme vrist ene weken,  
 dat ik mit vrunden moge spreken,  
 dat ik my berade umme dit sulve,  
 wat ik antwôrden moge deme wulve.  
 5775 Do sprak Gyremôt, des wulves wyf:  
 sêt, Reinke vos, al juwe bedryf  
 is schalkheit unde boverye,  
 legen, dregen unde tûscherye.  
 ja, de juwen wôrden gruntlik lovet,  
 5780 de wert gewisse int leste schovet.  
 juwe wôrde syn lôs unde vorwôrn,  
 dat vant ik also by deme hœrn,  
 dâr de twe ammere hengeden an,  
 gy weren in enen sitten gân,  
 5785 dâr were gy mede neddergedreven,  
 nicht konde gy sulven ju darût heven;  
 gy kemeden sêr, dit was by nacht,  
 ik sprak: we heft ju hierin gebracht?  
 do ik ju hôrde in deme putte,  
 5790 do spreke gy wedder, it were my nûtte,  
 ik scholde in den anderen ammer stygen,  
 ja, ik scholde denne vische de vulle krygen.  
 in untyt quam ik den sulven wech dâr!  
 ik mênde, gy hadden gesproken wâr;  
 5795 gy sworn enen êt by juwer sele,  
 gy hadden der vische getten so vele,